



INATSISARTUNI

Partii Inuit
Randi Broberg

UPA 2014/134-1
20.5.2014

PILLUGU: Pilersaarutit annertuut sanaartornerisa nalaanni nunanit allamiut najugaqalernissamut sulinissamullu akuerineqarsinnaanerat pillugu Kalaallit Nunaannut Inatsisip Kalaallit Nunaannut atuutilernissaa pillugu oqaaseqaateqarnissamut Inatsisartut aalajangiinissaanut siunnersuut.

(Inuussutissarsiornermut Aatsitassanullu Naalakkersuisoq)

Siunnersuutikkut Naalakkersuisut ujartorpaat, Suliniutit annertuut aallartisarnerini suliassat pillugit Inatsisartut inatsisaat nr. 25, 2012'imeersup, pingaartumillu taassuma allannguutai nr. 13, 2013'imeersup suliartortut qanoq atugassaqtinneqarnerinut aalajangersakkat atortuulersinnejarnissaat.

Partii Inuit tikkuarusutagut makkupput:

1. Siunnersuutip qulequtaani oqaatsip "najugaqalernissamut" atorneqartup paatsuunganarnera peqqutigalugu, tulluarsorinanngilaq. Oqaaseq atugassatut tulluartarput tassaavoq "najugaqarallarnissamut". Tassuunakkut atuarneqarsinnaammatt piffissakkut killilikkamik akuersissuteqartoqarnera.
2. Maluginiagassaavoq pisuussutitta uumaatsut qallorneqarnerini, isertitassatut isumalluutit tassaanerummata, sulisut isertitaasa akileraarusersornerisigut isertinneqarsinnaasut.

Tamannarpiaavoq Partii Inuit illuatungerluinnaanut saatittariaqartutut isigisarput.

Aatsitassarsiorneq ingerlanneqartariaqarpoq inuiattut uagutsinnut qallikkut ilorlikkullu pissarsiviunerpaasussaq tunaartalarugu.

Tamannalu pisinnaavoq naqqaniit aallartittumik, uagut namminerpiaq piginnaasagut aallaavigalugit aatsitassarsiornerup inerisarneragut, taamalu pisuussutitta uagutsinnut iluaquitissanngortinneragut. Ullumikkutut inortuilersutut pissusilersunngikkaluarluta.

3. Najugaqarallarnissamut sulinissamullu siunissami akuersissutaasartussat eqqarsaatigalugit, ullumikkumut misilitakkatta takutereerpaat, avataaniit suliartortut killilersimaerneqarnissaannik inatsisilluunniip eqqortinneqannginnerra ulloq manna tikillugu pisoq. Taannaannarluunniit eqqortissinnaanatigu, qanoq uani nakutiginnitoqarniarami?



INATSISARTUNI

Najugaqarallarnissamut sulinissamullu akuerisaasut nakkutigineqarneri qanorpiaruna aaqqiivigineqarniartoq?. Tassami aatsitassarsiornermi pissutsit ataatsimut isigalugit nakkutigiuminaalliartornissaat pitsaliorniarutsigu, aallaqqaataaniit erseqqisumik sukannersumillu nakkutilliinissarput pisariaqarluinnassaq.

Qulaani assersuutitut taaneqartoq uteqqinnianngikkutsigu. Taamalu uagut aasiit isiginnaartuinnartut inissinneqaqqissanngikkutta.

4. Nunatta Eqqartuussivia saqitsaannerni apuussivissaq siulleq, piareersimava suliassaqarnerulernissaminut?. Nalunngilarput ullumikkut eqqartuussiviit suliassatigut kinguaattooqqammata. Aatsitassarsiutileqatigiiffiillu illersuisoqarnermikkut, Nunarsuarmi nukittunerpaajusut eqqaamagaanni, ilumut piareersimasoqarpa?

Imal. illersuisugissaarnissamut akissallit kisimik soqutigisaasa aallunneqarfiaattut suna tamarmi ingerlalissava?

Suliartortoq imal. atsitassarsiutileqatigiiffik inatsisinik unioqqutitsippat, taava qanoq qisuarartoqartassava periuseqartoqassavalu?

5. Ernumanarteqaarput, avataaniit aningaasaliisinnaasut kisimik ukkitaanerat. Ullumikkut uagut inuiaqatigiinni inuttut pigisaqanngereeqaagut, pigisat nalillit suliffeqarfiillu uagutsinnit pigineqartut ullumikkut suunngillat.

Inuiaqatigiit pisuussutitta naapertuunnerusumik agguataarneqarnissaat qitiutipparput.

Tamannali qaqugumut pinavianngitsoq Partii Inuit takusinnaavarput – ullumikkutut sukaterineq, uagutsinnut annertunerusumik pissarsiviunngitsoq kisiat ukkitarineqarallartillugu.

6. Isumaqpugut suliniutit angisuut ataatsimut isigalugit, taakkulu sunniutaat ataatsimut eqqarsaatigalugit, inuiaqatigiittut nammanneqarsinnaanerinik nalilersuineq pisariaqarluinnartoq.

Aarleqqutigaarput suliniutit annertuut aallartereerpata, inuiaqatigiinnullu sunniutit pitsaanngitsut pisalerpata, aatsaat nalilersuiniartoqalernissaa, Taamatullu inuiaqatigiittut atukkatsinnut nanertuutaaleratarsinnaanera.

Partii Inuit taama oqaaseqarluta, innersuussutigaarput siunnersuutip aappassaaneerneqannginnermini ataatsimiititamit isumaliutissisoqarnissa. Paaserusunnarmat aamma naalakkersuinikkut soqutigisaqaqatigiit iluanni ilumut isumaqartoqarnersoq, siunissami qaninnermi suliniutit annertuut aallartinnissaannut inuiattut piareersimasugut.